

光緒丁丑季冬二刻

樵隱詩話



三刻續出

板存寓所
翻刻必究

樵隱詩話卷三

星少象鼎氏林 鈞著

武岡張廷相司馬又字南皆

經贊丁酉
選拔由教習得知縣

需次羊城三十載歷任難缺皆有循聲當咸豐中紅巾
倡亂需才之際君丁父艱大府知其才奪情強用墨經
從軍卓著戰績保遷司馬而險阻備嘗讀其從軍篇一
章令人感泣如身歷其境至讀八哀詩及海南詩鈔則
深惜其才而悲其遇也其爲詩氣厚詞雄古長于律不
屑爲排比對仗而憂時感慨屬詞比事直自與少陵差

近自序其集謂嚮不好韻事而迫而爲是不得已之詞
蓋非虛語夫不得已而爲之者天籟也學而爲之者人
籟也天籟詩之上乘也予亦天籟自鳴者故論詩每取
此種雖曰性之所近然亦千古定評非予一人之私言
也惜其篇長不能多錄茲錄其催科難一篇以概其餘
且亦見其爲政之苦心而于時事亦有裨補焉其詩云
古人勤撫字政簡民不擾今人重催科政拙乃下考簿
書困寢食剖析及分秒長官飛章來輒云吏議絞民瘼
不關心賦完官事了我來撫新州秋風七月早矢志勵

清操敷政學懷保才短情爲通察獄無大小風俗壞人
心疲頑更佻巧民情遽難洽轉瞬已秋杪驚心催檄繁
吏役不絕道文告久空懸肺肝徒焦燥輕騎往鄉村疾
苦詢父老父老謁道旁懷刺自介紹衣冠學步趨語言
肆糾譎賢愚多不齊唇舌難分曉下馬入蓬廬室暗塵
不掃抱膝倚危窻愁腸數縈繞分道嚴追呼比戶窮搜
討弱者相率逃强者互爲矯戶口分畸零胥吏半獍狫
幾會勤奉公舞弄圖醉飽夜靜人聲喧鵠立聽比邻
算燒紅燭鞭笞折青篠號哭聲滿堂嘆息頭暗掉有時

獲夙逋形容類枯槁足臂兼耳聾頭童或目眇問之絕
不知蠻音如啼鳥刑罰無可加對之倍色愀試取舊
冊觀欠多終完少今朝復明朝朝朝尋懊惱念此非良
村舍之去他堡臭味無差池搔首戶庭遶出門望田疇
高低孰晚稻童稚嬉且歌共說豐年好豐年猶如此那
堪遭旱潦嗟哉兵革興數載征塵攪粵寇犯江南遍地
塗肝腦有田不得耕安問稼穡實賦稅無可供溝壑填
餓殍軍餉日以亟悵望憂心情自顧無苛政天空白日
曠民不諒予心亦應感蒼昊好義助太平綏豐慰頌禱

况當豁免餘 君恩良深浩人各有天良相期抒懷抱
胡勿輸將勤而欲法令撓恩威有時窮蠻徼豈天造直
同化外民不信風偃草相習云成風此風曷以肇有懷
無可言悶坐酌清醪竟夕不成寐明月何皎皎忽驚朔
風巖破壁摧欲倒慄慄歲云暮怒焉心如擣供納有常
期糾劾無白阜收令真難爲苦衷向誰表自序云癸丑
七月承乏新興自秋徂冬遍歷四鄉始信催科之難悶
坐無聊爲寫其情狀如此予昔從軍至閩粵江右三省
交界之區聞其俗悍民刁多抗糧不法有司代爲完納

今讀此詩愈微之矣粵俗之頑于此可見是在大吏設法調劑此等瘠缺而遴賢牧令以久其任俾其以禮義教民潛移其獷悍之習庶可挽此頹波若數月一更代之有司視官如傳舍小民視官如過客則其俗日頹而其習益深不可救藥矣予之不憚煩而錄此篇者亦願在位者共知其難而勿憚其難設法以救其難且化其難勿令其終難是則私心之厚望也歟張君所著詩多有關係顏之曰守丹山房詩鈔其示予者僅其所刊行摘古詩鈔數十篇而已茲再摘錄數聯五言如晨往靈山途中口占云山入天邊盡雲隨日上開稻香含曉露秋氣老平林聞捷云秋老多清氣天空有白雲渡海云地迥珠厓小秋高翠靄生洞酌亭全首云洞酌舊留名于今尚有亭井泉羣挹注庭樹幾飄零海氣連天紫山光共眼青來遊動幽思風日淡郊垌七言如野望云高擎翠蓋枕榔老亂架青枝薜荔堅偕友遊景遠亭小酌云四面窗櫺風入座半園花草露凝香開衿此際同懷古放眼長空不碍山與世無爭禪意淨任天而動宦情閑中秋望月云香透珠簾風有味涼生玉砌露無聲頗

與少陵放翁相類出語自然不似今之有心雕琢者
劉海舟孝廉爲人性剛直尙氣節敦風義居心坦白好
揚善不宿怨律身不苟自負不凡三屈春闈雖援例捐
中書而金馬玉堂之志仍未衰也前年滇省請揀發將
與揀以未遂科名託病不往近爲家窘借助他山非其
志也其感懷云二南政且先修已三北心猶不讓人十
載科名慚畫虎半生才力悞雕蟲又有題蘆鴈圖結句
云順風一舉冲霄上不傍平沙淺渚飛其志可知乃命
多偃蹇所如輒阻非遇忌才之靳尙卽逢蔽賢之文仲
嘗有句云直道事人招謗易上交知己感恩難交非知
已誰肝膽事到求人總汗顏是則爲予之寫照也夫予
與君不獨性情相類而出處亦相似何我輩之多窮耶
雖然君強幹精明年富德進彼蒼蓋有深意將欲以風
塵老其才而大其用也若予之不才多病直爲造化之
贅疣矣君見贈二律有云一爲壽世爲名世各自扶搖
九萬程則予深負斯言矣予之詩話恐未能壽世奈何
然感深知已矣

福建侯官同宗耀如齋尹 慶炳 名士茶叟之長嗣君也

聞予作詩話抱其尊人及令弟所著詩集屬選卷軸繁多目不暇給茲先錄君所著粵遊數則焉七言如于役東莞廬資福禪院云幾樹花香招蝶舞一池水縐動蛙鳴五言如心爲依僧靜身緣作客閑此數聯皆可傳誦自云存詩本多乃將刊行而被六丁攝去茲所存者僅焚餘數首耳嘗鼎一臠可知味矣君更長于經學刊有說文字辨周易集解補箋行世幼年穎悟其尊翁嘗嘉其說易諸篇頗有理悟作七絕以勗之云苦心長對一燈青喜汝騰辰善說經消息天人能解悟得閑我倚竈

觚聽童年卽能如是可想見其易理湛深矣乃久因秋闈橐筆來粵因援例就齋尹加銜州佐非其志也又言筮仕後又著焚餘偶錄粵齋紀要并撰功過格三字經以勸世其功過格說文字辨兩書則予見之其他則未見也予初以直道待人多爲沽名輩所誤今不得不改矣願君副斯言也衣謔山房詩集吾子先生昌彝所著先生昔號硃

砭山人晚嗜茶又名茶叟燿如齋尹之尊翁也先生湛深經學已亥舉于鄉八上公車四薦而不售顯廟御極之元年先生以所著三禮通釋由禮部具奏

進呈 特旨褒嘉有留心經訓徵引詳明之 諭又有
留心載籍非浮靡之學之 諭賜官教授任鐸建甯邵
武兩郡以敦品植學訓士名滿海內公卿爭納交之著
書盈屋其射鷹樓詩話早經行世海天琴思錄衣謫山
房詩賦鈔試帖東瀛唱答鴻雪聯吟硯耕緒錄詩玉尺
四臣表遂初堂制藝諸書皆已刊行其待刊者尙有數
十種又樂刊善書如玉歷考證洗心錄又十餘種而胸
衿豪邁每談海氛激昂慷慨復著有破逆志四卷並繪
射鷹驅狼圖以見志又著有軍務備採前徽歙王子槐

少司馬

茂蔭

稱爲濟世書進呈

御覽以不獨學問優長且留心時務深諳韜畧入薦誠
一代奇偉之士非特以詩鳴世已也先生當弱冠時族
人有覬其資而逼行賈往大西洋者其母 太安人以
死爭之事始寢有老明經陳鳳翔精星卜聞其事欵門
請筮決之遇大有喜且驚曰火天之象無不照大有之
義無不包是將以德義文章著名者賈何爲哉晚年主
講廉州海門書院丙寅八月初七日其講堂屋脊鰲頭
忽吐火數尺光焰接天數萬丈五色斑斕聲如雷鳴夜

間火復發縱橫數十丈照耀合浦遠接海門門士記以詩者百餘人豈非大有火天之象驗哉先生經明行修中年卽名滿海內士大夫皆以漢之賈馬許服爲比晚年年彌高德彌劭英奇之士皆願出其門下予久心企焉丙子來粵亟訪之不意先生已歸道山一載矣冬初哲嗣耀如抱其著作數種並慶七秩壽徵詩啟見示始悉其詳先生以經學著名詩非所專而所著詩話屏香齋崇名教則與予有同志焉茲錄其佳句七古如桐江釣雪圖云蘆花兩岸飛濛濛江頭萬鷺栖孤篷白雲在

天呼之下釣絲直拂金鰲宮其釣非釣雪盈把不釣利名如君寡得魚沾酒醉便休細雨斜風歸去也節短音長其閱世廿一首皆至理名言老成練達今錄其中一首嘗一鬻可知全鼎矣詞云君馬黃臣馬蒼兩驂相逐如雁行南山牡北山牝水草寢訛矜顧影牝牡驪黃各一羣選毛配色爛如雲立仗十年不一鳴此物真堪瑞太平一朝秦寇從天至盡出天閑當敵騎旆卷霜寒鼓聲死踈地長嘶淚盈臆四十萬匹盡駑材畢竟龍媒在何地當時取我取驪黃如何驅我陣雲旁當年相毛不

相骨如何今責電霜掣君求千里百戰馬請覓鼓車鹽
車下

五古如短歌云疏者日已疏親者日已親富貴與貧賤
一卷歸藏墳墳中死骸骨昨日方采薪昔者哭戚友今
者栖烟塵只見百年樹不見百年人言懷其一云海外
有五岳上與銀河通中有神仙人碧落敲晨鐘元牝發
天苞紫氣來金闕搏桑不起雲倒吸靈臺月其八云蕭
蕭北邙山壘壘死人墓死者在生時名利榮朝暮富貴
位已極貪欲不肯悟想見彌留日性命危朝露尙爲子

孫計田園金石固誰知百世後飢渴莫能度何不飲醇
醪徘徊紈與素同友登鼓山大頂峯云振衣巉岩巔飛
蘿捫絕磴萬壑天風迴泠泠獨清聽高秋入青蒼上方
發鐘磬八衝聞流鈴穹廬虹氣亘眼中十萬戶一一羅
形勝花雨雲外落冥茫墜鳥徑坐嘯日西沈羣山不敢
應儻然出塵埃餐霞塵夢醒

佳句五言如道山僧舍次亨甫韻云浮雲惟鳥度落葉
有僧歸潮落江天渺鴉棲暮樹深乾坤容我醉肝膽向
君真白雪寺云霧氣不離屐嵐陰常在衣讀書南園題

壁云綠天蕉欲雨陰地石生雲空山聞落木方夜起禪
心池魚行樹影山鷓愛書聲風雨上石竹山云鐘飛江
樹黑潮落海門青秋日晚晴登于山樓云梅落風前笛
鐘飛雨後山故人同菊淡暮鳥逐雲閑孤亭云亂山青
抱郭萬竹翠成村同友登鼓山遇大雷雨云雲奔山欲
動烟立水孤飛秋夜登城樓云白雲千雁影黃葉萬秋
聲題白雲館壁云書得未曾有山深空所無

七言如柳色云六朝金粉消難盡十里樓臺遠更宜與
黃蓮卿夜話云霜花滿地愁孤枕寒柝驚秋共一燈弔
古戰坂云蘆管吹殘霜月冷戈鋌葬盡雪花深秋聲云
無情草木驅之響有恨乾坤假以鳴政和左齋夜坐云
落日青楓嘯山鬼蔓烟白草泣封狐同友登凌霄臺云
鼓角秋高鳴似語關山涼露落無聲濟甯登太白酒樓
云故人今古餘明月分野山川應酒星登天章臺望大
江云萬葉帆檣殘照裏亂山鐘磬落花中

七絕維揚懷古其一云金焦兩點對朱樓灑灑江山一
片秋殘笛數聲帆影去竹西歌吹是揚州其六云胭脂
舊井長青苔那信隋宮又劫灰亡國不關春草恨年年

綠上鬪雞臺其十一云西風落盡廣陵花處處垂楊有
暮鴉蕭瑟飛螢金粉地青蕪寒雨玉鉤斜其十五云楊
子津頭江水深岳韓戰壘久消沈戍樓鼓吹殘秋後斜
月還明皂角林其二十三云小杜吟魂不可招淮南依
舊玉人簫可憐十里珠簾地明月無情廿四橋其二十
八云桂花風裡酒初醒縹緲江帆不斷青正是二分明
月夜晚涼人話玉鉤亭五律如貧女云貧女安貧甚綉
蘭佩自芳惟知勤紡績無事艷梳妝力卻千金聘甘分
十指忙榮枯吾有命不肯玷幽香此首直是自描小照
矣釣舟云半壁魚鄉地居然避俗塵蒹葭呼稚子車馬
看勞人入饌鱖盈尺浮家花四隣歌來山水綠此是葛
天民劉坑夜泊懷劉炯甫云今夜建州月蒼茫起客愁
一輪天上鏡萬里海門秋峯影澹欲遠谿雲凝不流因
風想之子此際獨登樓舟發鰲頭云一葉渺然去人烟
向櫂開傍帆雙燕下入眼萬山來水國雲爲海溪聲浪
作雷中流橫玉笛二月落疏梅

七律晚泊劍谿寺門云紅樹青山宿火稀水亭隱見掩
柴扉村莊黯黯燈初暝河漢冥冥雁獨飛涼露白橫荒

寺冷大波綠送遠帆微灘頭怪底驚栖鷺來浣游僧白
袷衣延平懷古云狼烟捲地舞鯢鯨鏖斗寒凝戰鼓聲
萬槩樓船飛古渡千家燈火枕孤城甯陵許遠空弓鏜
淝水王琳失旆旌碧血忠魂塞日月登壇合擬一軍驚
先生詩諸體俱工出入漢魏凌爍唐宋天姿學問兩者
具備非淺學者可望其涯涘也

先生得力于母教繪一燈課讀圖一時名公題咏如雲
集成卷軸刊行久矣閩縣林石甫序其事云吳太安人
桂父西漁閩縣學生員與其子相繼逝存一女一孫三

齡家貧無以爲生太安人時年十五告貸于戚屬不之
應念吳氏僅存一脉遂自鬻于祥麟翁家以其鬻資寄
祥麟所得息養兄子卽今閩縣學生吳嘉鈺也贈君卿
雲先生以質遷從大西洋歸聞其賢乃聘爲側室入門
婉婉慈惠曲盡婦職嘗侍君舅疾奉湯藥經年無怠容
兩次割股肉以進撫前室三子皆如已出性勤儉敦任
恤溫恭和易產丈夫子二次卽薌谿少有異稟太安人
知其非常加意訓督六歲從學宮觀釋菜歸太安人問
之曰兒見殿上高坐之聖人乎見四配兩廡之賢人乎

是皆古之讀書窮理仁義道德中人兒當學之科名身
外事耳故先生能知立志蓋早聞于母教焉先是卿雲
先生以家計故航海歸族人謀使薊谿行賈太安人力
爭之不得則自擲于井援而甦議始寢云予按古之賢
人得力于母教者多矣若吳太安人之賢不難其訓子
成立而難其勗以仁義道德願其子爲名儒不願其富
貴不難其訓子而難其知子于未成之時不難于青燈
課讀而難于投井死爭也嗚呼宜傳之不朽上與孟母
爭光矣課讀圖集中名公題咏百餘首美不勝收茲惟

錄閩縣劉炯甫太守存仁七古一章以風世焉詞云啞

啞鳥夜啼鳥啼一何苦誰識慈鳥反哺心覆之翼之豐
毛羽有兒不克持門戶不如棄儒去學賈偉哉賢母一
片心謂兒置身貴千古儒林道學世所欽願兒樹骨文
章府機聲課讀夜燈明兒今學成享大名五經紛綸媿
許鄭淹通博雅聲錚錚兒舉孝廉母不聞泣思母訓心
如焚小人有母今不見當年下第悲劉蕢曩時總角交
倡予歌和汝申之以婚姻親情話兒女兩家同述慈母
賢相對無言各淒楚君今奪席凌戴馮嶙峋氣骨氷稜

稜四方豪俊爭識面十年八上長安城我亦京華再相
見哀歌不獨傷貧賤竭來投筆事從戎吁嗟人海浮雲
變唾壺擊碎爲我歌人生少賤空蹉跎曩日雲龍今退
鷁側身天地當奈何池邊五柳樹成都八百桑有田曷
不歸故鄉與君把酒天蒼茫昨夜啼烏滿江浦苦憶君
圖淚如雨寒食松楸化碧烟與君飲泣無三鬴劉君已
西科舉人出宰甘肅歷任茶馬同知渭源永昌知縣卓
有政聲著有岷雲樓詩集勸學芻言性孝友舉孝廉方
正薦擢秦州嗣從軍保升知府今掌教閩省道南書院
品學均足楷模後進篤友誼集師友詩八十餘人名篤

舊集

課讀圖集中有番禺丁仲文杰觀察題五律二則云義

利聖狂判賢哉慈母心雲霄爭萬古塵土視千金永夜

檠移短寒泉練汲深斷機成子學洵足嗣徽音悲感無

端集披圖憶幼年北堂憂莫解東魯學親傳予少孤家

夫人以養以稽古慚三禮乘時冀一鞭只今仍匏落腸

斷蓼莪篇仲文觀察湛深經學晚年好道著書著有黃

老合編行世曾與予書云少時亦耽吟咏後因四方多

故遂盡除積習奔走半天下思欲一効鉛刀之用于當代名公巨卿均曾識面而賦性耿介所如不合歸卧故山云云亦可想見其爲人矣

薊谿先生德配周安人

葉芬

性行淑均幽閑貞靜先生

家故不豐日以著書爲事不務生人產賴安人勤儉摒擋親操井臼且作女紅以佐先生讀不以家務累之真賢內助也嘗著有訓子七律數章錄其中二聯云儉吝兩途須剖辨驕矜二字要消除交友須先求血性立身宜要振精神四語名言至理不得以尋常巾幗目之先生有悼亡遺鏡詞七古備紀其賢篇長不能具錄

雲鶴山人詩鈔茶叟次君衡甫一尹

慶荃

所著詩有家

法其佳句七言如春雨云殘紅滿地客扁戶短屐幾聲人過橋秋望云鳥影斜連江色遠濤聲遙撼海門高秋月云今古蒼茫迷此色江山迢遞皓無聲秋雁云一行寒色有霜夜幾點殘星無月秋和友冬夜云風露一簾吟思冷琴書半榻夜燈青和咏牡丹云三月樓臺濃淡影一團錦繡嫩寒天

五言如秋窓夜坐云亂蟬送夕照一雀度西風冬日云

達理自知命無求人亦仙山行日暮云村犬隔雲吠亂
鴉分樹栖次友韻云詩瘦句多骨月明天似秋書壁云
秋菊雨中澹落花門外稀醉口云村小松烟合天寒鳥
影稀

七絕如秋江夜泛云碧空如水望悠悠暗弄梅花靜倚
樓十二珠簾齊不捲滿天風月淡宜秋

五律如過萬石灘云霹靂劃天破喧豕奔馬聲風如吹
水立山欲挾舟行衆命一時險亂灘孤櫂聲安危憑造
化憂患不須生答友云蕭蕭衰草色三徑暮烟霏無雨

月生夜有梅香在衣霜寒燈不焰風緊雁難飛爲報故
人到家僮開竹扉山人年尙少而其詩已如此精進未
已不可限也各體皆工五七古中多警句如黑雲儼如
人一片立在水等句皆見賞於名公云

余雅不喜苛論古人而作詩以詆古人者尤屬失忠厚
之旨夫毀人之短以炫己長有傷盛德況古人業已成
名而去于我何尤而必厯指其疵瑕以自誇識力豈君
子之所爲耶而詩之爲道尤宜忠厚和平若醜詆之更
失風人之旨在作者自鳴得意而不知有識者已竊笑

其輕薄矣孟子謂尙論古之人者豈醜詆之謂耶若讀史鑑發議論辨判忠奸賢智固吾人讀書分內之事然持論過刻亦且不可至古人詩文流傳已久更何必力加詆毀不遺餘力耶吾見嘉魚余旬甫作詩話痛詆東坡至謂東坡言欺世赧口久不誦等語而觀其所作不能及其萬一恐東坡非欺世而渠自欺世也近見有人痛詆隨園而予觀其詩則又學隨園尙未之及也掩耳盜鈴殊屬可笑夫東坡隨園兩先生天姿學問俱加人一等故能于人海之中獨樹一幟正以其不傍他人門戶爲貴而詆之者謂未窺漢魏此隨園所謂總督衙門之挑水夫也夫文章爲性情之花以獨出心裁爲上品三百篇之工以其無所師承也而規規乎抱漢魏藐唐宋自謂爲得詩中三昧所見卑矣夫今人生古人之後固不能出古人之範圍然亦何必步步趨亦趨耶且東坡隨園果無真才顧何以震驚一世未必當時之人羣皆無目任其欺飾而必待後人之指摘耶凡爲此語者大都皆淺學耳食之輩其中初無主柄聽一二名公之言而附和之焉否則藉此鳴高非由中之言故予不

欲聞之 國朝著作家奚啻數千而其膾炙人口者在
詩話惟隨園在文章惟聊齋小說惟紅樓夢三部而已
其他汗牛充棟吾未見家誦而戶讀之也宋之詩人亦
惟東坡爲最著豈盛名必遭物忌哉

阿芙蓉之流毒中華久矣有心世道者作爲詩歌詞賦
以勸世其新穎者多矣然或譏刺過當失風人之旨予
獨愛許雪門觀察詩草中十餘首茲錄其中數首云快
蟹扒龍濠鏡前赤籐手握鑿花錢金鎗拋落神州去從
此人間有禁烟已沒銀蟾夜氣疑蝦鬚簾箔窈窕層層休

嫌斗帳無光彩紅毯長添鳳腦燈無管爭吹引鳳簫鷄
鳴枕畔墮珠翹牙床玉體橫陳日別有氤氳氣不消鳳
肩高聳不因寒每到黃昏出玉闌生怕抬頭望新月烏
雲西海正漫漫慘淡乾坤貯一壺模糊歲月伴燈孤曉
來試取菱花照可似當年玉貌無又自卷一雙蝴蝶袖
香痕撩亂唾花斑十分火候功成否供奉惟應讓鼻先
阿儂新病長卿渴爲買林檎蔗桿青清詞麗句諷刺蘊
藉不似劉四罵人

張賓娥者畫師陳雪山女也姿容絕代工繡能詩從父

學畫碧桃胡蝶尤稱妙技乾隆末長沙守張某聘以千金居室皆窮極奢侈不可殫述其尤艷者冬則貂帳貂簾鑄金鳳凰于簾鉤之上衣宮裝之衣見者擬爲天仙後太守因事羅法賓娥作歌訣別有綠珠殉主之志觀察某賜以金勸撫遺孤娥是以不死至今湘人猶道其事雪門觀察咏其事云竊取嫦娥月裏名廣寒宮闕記前生南來五馬千金俸不問蒼生只問卿又云更有深情人不識一雙金鳳住簾鉤研脂儘把桃花寫那識西風已降霜

嘉慶初年甯波女史馮氏自繡花旛五百不下樓者二十年繡訖來昭慶寺懸掛矜艷炫一時亦佳話也雪門觀察有詩記其事云入寺人傳馮女事廿年壓線甬東樓花旛五百今何在一片莓苔古佛秋

浙闈謄手入夜常嘯一人唱聲衆棚響應俗名號嘯謂是可以除魔雪門觀察咏其事云聽餘伐桂斧丁丁又報蘇門阮嘯聲鶴唳猿啼渾莫辨秋風總是不平鳴

予初至羊城見人家門首多懸鳳尾蕉一名火蕉不解所謂

令僕詢之方語莫辨昨見射鷹樓詩話云猪簪箸可除

鳩毒鳳尾蕉能禦火災漢陽劉菽雲學正傅瑩句也按

毫猪一身盡毫能發矢射人取其毫作箸遇毒輒作聲

又按桓臺王大司馬輯火經言隨時改火人不病火症

鳳尾蕉能壓火災二事足廣見聞予可謂聞一得二

黔中貴西周錫侯嵯尹起桐以軒冕世家作嵯曹未吏

先隨其兄起濱方伯來粵居棗募之樓入蓮花之幕多

所贊襄由二尹改塩經需次廿年貧翻勝昔聞予作詩

話以所著尺蠖吟草來訪年逾古稀而精神矍爍豐願

隆準鬚髯飄然謙謙靄靄心虛似竹讀其詩益忠厚誠

實天籟自鳴不知雕琢者也雖無奇警之句而自抒性

情語出至性可想見其平生誠樸無偽古不違俗語不

譏時絕無紈袴風月之習其品詣亦足重矣予感其以

老下少之情且憫其境也爲擇其佳句錄數聯以爲驕

矜者勸七言如自慰云鶴舞自憐終歲瘦花開休羨十

分紅端陽卽事云宦味渾同黃蠟嚼官閑轉似赤駒忙

觀劇云裝罷許多腔合調霎時轉眼一空塲二語足以

醒世差次口號云閒情欲遣翻難遣應事需才不必才

寄慰女弟秋圃恭人云人是未七七不得運逢其厄厄

難堪偶成云寒生兩髻成潘岳冷到雙眉似馬良五言
重陽寄內云八載重陽節年年共菊觴酒浮今日白花
憶故園黃得句傳雙鯉登高望五羊遙知萸徧插兒輩
列成行七絕偶成云散步偷閑向晚晴疑無路處小橋
橫一竿坐看漁翁釣買得魚歸踏月明

五言香港卽事云樓臺連海岸棟宇接雲烟水患云街
心撐小艇屋角掛長梯又差次舟廨卽事云執事船如
蝸角國簿書案用虎頭牌又五言云雪堆天際白日出
海邊紅此數聯皆眼前景寫來自成佳句又有句云清

風明月助開窓助字用得極佳

潮州有西湖爲一郡名勝處昔人有一聯云湖名合杭
穎而三水木清華惜不令大蘇學士到此山勢分邨郭
之半樓臺金碧還須倩小李將軍畫來語殊工切

潮州金山寺之前有坊題曰第一山山有馬公墓錫侯
齋尹有一聯云千秋事業千秋墓第一家埋第一山按
馬公諱發海陽縣人宋末爲安撫使摧鋒寨正將刺潮
州事宋鼎革時元兵圍城公力戰捐軀全家殉難州人
哀之爲合葬山頂

潮州韓文公祠壁碣鐫有公所書鸚鵡賦龍蛇飛舞人爭揚售

豆腐魚者魚名也色白柔脆潮州有之亦聞所未聞者錫侯薩尹有句云玲瓏剔透三冬雪粉膩生成一片冰饒他各色都鮮美柔脆無如豆腐魚何以當日東坡只知蠔味哉錄之以廣博物

舟楫之制利遍宇宙而其形製迥異名色懸殊蓋以地異也罕有方與圓者惟黃河渡船其中形頗如瓢而潮州之船則方亦異製也

羊城窓櫺皆以蠔鏡嵌之年久則黑殊不明亮無足取而比戶皆然竟置紗綺于不問今詩人多以蚌窓改紗窓矣予初至其地驟讀幾不解其所謂

卷三終

樵隱詩話卷四

象鼎氏林 鈞著

綠雪堂詩草會稽王笠舫進士

衍梅

著其友汪孟棠觀

察

云任

爲之梓行者也王君故名進士爲阮文達公高

足爲孝廉時橐筆遊嶺南督撫尊爲上客及舉進士授
粵西武宣令旋改廣文迄無所就歿于桂管才豐遇齋
越中皆以爲徐天池復生臨終囑其子以所著託之汪
公卒能竟成其志盡任剗剔之費爲數甚鉅其嗣君窓
山明府

文偉

又復稽求佚散于親友遂得流傳汪公之

篤友窗山之善述皆可以風世矣朱子奮通守以其集示予讀之瑰奇博麗胸羅萬卷憂時感慨賦物精細雅與義山相近集凡十六卷詩詞歌賦皆具洵一代奇才也年十七應縣試邑宰王韞渠驚賞其文欲以女妻之而忘爲同姓亦佳話也性高曠嗜酒厭治生人產名重一時俯視塵俗嘗忤要津真奇士也嘗以十五咸全韻咏江瑤柱評者謂爲絕唱

茲錄其尤佳者數首五言如放翁書巢云人語酒家燈南樓聽雨會闕雲飛似雁老樹禿于僧坐擁書千卷行

消酒六升柳姑祠畔路流恨到黃藤輔文侯牛將軍墓云冤哉一盃酒醜殺此將軍少保難爲慟高皇竟不聞議和甘養敵行毒當酬勛萬古風雲氣來朝主帥墳嶺南雜誌云信善非吾土胡爲久滯留談經逢啞虎舐墨出痴猴水惡妻孥病天低霧雨愁籬根有黃菊瑣細不成秋冬暖云嶺外三冬暖酣酣樂事增蝶飛常學雪魚戲不知冰巷有擔花叟門無踏葉僧翻憐桃杏輩開早恐難勝卽席留別云木葉落湘渚烟波何太深浮雲平野合去雁遠天沉對此一樽酒蒼然千里心它年逢令

節相憶定長吟訾州道中云擊汰二百里昭江接桂林
人聲喧雨氣船影過岩陰白鳥忽雙下蒼猿時一吟前
村有茅屋得酒且徐斟昭州錄別云桂嶺租茅屋灘江
泛釣槎一官真似夢萬里且爲家匏葉休忘苦蒿心務
去邪欣榮自有候慎勿慕唐花

七律如後漢帝云成都破竹勢如奔赤帝空歸白帝魂
一戰南陽龍有子再亡北地漢無孫揮戈落日三巴路
流涕西風五丈原獨恨佞臣偏後死慣持降表走軍門
悶遣云苔痕一雨綠閑窓雪避東風不渡江夢裏快遊

尋有味閑中佳句竟無雙琴書福分因貧覺羅綺心情
借酒降裘抵半生清興在玉梅花下辦銀缸新晴西湖
散步云才入西冷便有烟曉妝濃淡各爭妍盡收畫意
歸詩橐欲買春光費酒錢三竺香人紅雨路六橋亭子
碧波船林家白鶴如相識好聘梅花問水仙虔州野泊
云渺渺西風蘆荻州崆峒雲物望中收一天殘照生鴉
背滿目青山畫虎頭八九人烟依竹住兩三漁火雜螢
流鬱孤臺畔清砧月重唱刀環鬢已秋
佳句七言如草堂云一家都在綠陰裏十日不離花影

前擬微之以州宅夸樂天云白蘋風細人沽酒紅藕花
深女弄船秋晚云葉赤霞烘千樹火山青日掃一峯烟
岳王墓云天下二分乾叔姪將軍一眼小江山秦始皇
云萬古帝王稱朕始九州郡縣削侯初遣病云處處醫
皆盲郭璞時時身作睡稽康悶遣云葯真轉畏庸醫試
書誤思尋別本刊放懷云我輩才名將福換累朝詩境
仗人開喜弟旋自龍川云一櫂蒼葭歸小陸滿城黃葉
下重陽七夕云要憑世上星辰手重繪天邊耕織圖悼
亡友云胸有烟霞名早澹老無邊幅性逾真偶成云香

篆曲從風細處樹陰圓在日中時蛙爲草深矜鼓吹螿
緣花落起樓臺寄家人云情比夜長那得夢體緣春瘦
不關詩澤國春陰佳日少名塲清福冷官多花氣暗蒸
三月雪窗光晴漾一湖雲讀雪舫秦淮行卷云蘭葉風
催三月渡桃花水帶六朝香
五言如淨慈訪小顛僧云水連花影白山入磬聲青除
夕云禽聲寒在樹井氣暖于雲秋暮雜興云日暮蟬停
唱天寒螿罷兵步月云鷺立一池雪蟲吟滿地霜幽栖
云人烟春樹外花氣午庭中游雲泉山館云亂雲山湧

翠深雨麥垂芒樹老將欹棟雲晴欲去樓一房惟竹石
萬壑自笙鐘雲氣通林白嵐光擁座青嶺南雜誌云翠
鴉盤茉莉紫鳳啄檳榔血蟲三月雨鳩鳥一房烟金銀
隨市氣草木得人妖黎人登獸貢蠻女獻魚租江村卽
景云星動魚沉笳潮平鷺畫沙過壽佛庵云堂空疑佛
定花好累人看舟中云蓬疎聽雨細風緊逼燈斜舟中
雜興云暝猿痴點半妖鳥笑啼兼雲藏岩箐密風挾浪
花驕旅館雜咏云蜜香蜂上課花落蟻行軍

七古游山三日歌云有脚不踏青山巔山笑此人端醉
眠有口不吸青天月月光照人俗到骨我持一杯飛上
山青山流連醉勿還仰頭白月跌入口酒氣縱橫吐星
斗醉復飲飲復醒酒香拂拂醺山靈青天無雲更情絕
和酒作詩寫之石欲讀自認已無迹但餘酒香兩三滴
後之遊者怪且顛咄哉此山生酒泉錢舜舉華清出浴
圖云君王新納壽王妃五家第宅皆光輝金珠照耀萬
花谷天下不肥妃子肥憶昔華清初賜浴水滑凝脂看
不足後宮粉黛盡無顏畧許三姨鬪娥綠一朵嬌紅旋
欲酥葯欄烟重不勝扶沉香亭北何人見偷寫凌波飛

燕圖漁陽鼙鼓秋風起斷送朱顏黃土裏可憐三尺薄
鯨綃昔日承恩今賜死山川滿目淚沾衣金鏡千秋照
已遲遙知劍閣聞鈴夜瘦過韓休作相時

摘句佳者甚多再錄數聯如秦淮云落日青苔修竹路
小樓紅雨賣花天桐廬卽景云滿城風雨催佳節一路
江山看美人梅關云時清古戍堆紅葉岩老幽僧化白
猿化字奇警卽事云漸諳世態宜青眼纔動名心已白
頭新建學海堂題祠云劍氣朝騰暘谷暈珠光夜湧赤
城霞荔應預識陳丞相花亦爭迎宋廣平夜靜二龍司

寶笈秋高一鶴下丹梯詩從鮑謝唐風啓文到歐蘇制
藝興贈友云願君細掃阿房蝨愧我空雕爾雅蟲謝前
輩某贈菊云老圃人如周柱史殘年花亦魯靈光昭州
記事云廢寺有鐘沉暮雨亂灘如鼓戰秋雲喜內子至
云久別頻傳卿念遠相逢忽似我還家寄家人云與月
樂天花樂地將詩驚鬼酒驚人家家宴云妻因量淺頻辭
爵兒爲題難請改鬪賀友遷任云楊柳風輕齊按轡桃
花漲滿快乘船山齋云晚日映山濃寫照午風吹案暖
翻書澹坐云十年豆蔻他鄉夢一片蘼蕪故國心晚眺

遣興云入洞雲多深樹暝看山人老少陽愁僧歸別寺
鐘初響雲過前峯樹忽陰大榕云似爾應稱無患樹多
生甘作不材樗送友之襄陽云桃葉烟波雙漿碧梨花
春酒一衿青毛女衣留秦代月孝廉船載洞庭春萍泊
生涯人瘦早桂花時節酒醒難

五言湖上卽席云湖光初拭雨花影欲扶人嵐光生戶
靜花影補廊虛兩用花影皆佳雜詩云讀史能蠲忿談
詩不諱窮嬌陽卷新葉宿潤醒殘花劉仙岩云山空四
時靜日午一鐘鳴偶成云山近雲生早官清客過稀卽

事云蟲絲映空一花影落池雙舒卷蕉天大縱橫筍地
寬感舊云往事存歌與空山閱醉醒又閱遣全首云清
猿下斜照獵騎散平林風逼秋星動山銜遠火沉宵長
遲漏鼓雨急亂村砧欲共幽人語蕭然何處尋蚤起偶
作云檐月澹虛影紙窗猶未明燈花白相語簌簌如有
聲佳夢去未遠追之或我迎落葉打芭蕉朗然天地清
五古雜咏云善哉解溪翁不錄疑雨集謂其詞訓淫青
衿易惑溺隨圓喜佛偕操戈與墨詰長蘆綜明詩次回
亦選入我觀叟風懷粉黛恣塗澤玉煥咏錦瑟何必搜

故實笑彼論痴符瑣瑣加箋釋俞國琛文同郭註莊義取

蔡編息目被前人瞞心緣邪思結盡芟鄭衛詩忽起膏

肓疾此詩實獲我心予採詩凡涉于艷體香奩者皆擯

不與選即聞采青樓之作亦惟取其情不取其艷或謂

孔子刪詩而存鄭衛似不必擯不知聖人之意欲昭炯

戒豈誨淫哉或亦取其情之深也其一言以蔽之曰思

無邪可知其旨矣

填詞亦新穎茲錄其沁園春咏不倒翁云矍鑠哉翁適

從何來辱在泥塗看三眠三起公然倔强一頓一笑全

是模糊捧腹堂堂點頭媿媿危自能持顛自扶移時仆

似兒童逃學裝做須臾怪渠撚斷髭鬚惹春夢婆來

認得吾儘相君之背這般富貴人心如面依樣葫蘆托

地翻身憑空粉碎還識先生烏有無休輕詆問人間強

項若是班乎

時鳴詩草浙江蕭山朱澤亭封君兆泉著子畬通守之

祖父也封君以名諸生作諸侯上客精申韓而居心仁

恕客來賓縣幕時典史某獲教匪株連數千家先生憫

之筆下全活萬餘人以子貴誥封朝議大夫又以其

孫爾輔 貴 晉封通奉大夫積善有慶誰謂天道無知
耶先生學淹博無所不窺詩文詞曲書畫皆可名世嗣
君梓其遺集行世其詩清壯澹遠蓋出入于少陵右丞
者也詞亦清頴雋永茲于各體錄數則

五律夜泛云城裏已傳漏湖頭方泛船水香荷正發山
瘦月初圓隔岸沉漁唱孤舟穩鷺眠上方魚子響繫纜
共談禪宿滴雲山房云禪室何清窈閔雲一戶扇藥紅
粘小檻苔綠染疎櫺月影穿簾過泉聲徹夜聽遠公如
有意留此學參經蘇橋道中云蓬跡嘆頻遷深山獨暮

天四圍皆樹色一望少人烟霜葉飛殘雨寒灘咽細泉
僕夫行最屬催促自堪憐舟中七夕云合離原有數牛
女且經年隔水尙如此那堪各一天秋聲動沙草夜色
起漁烟漸看月將落徘徊人未眠登柳州別駕署東閣
云閣小神偏曠遙天一望時江從三楚曲峰到百蠻奇
淡日芙蓉國寒烟柳子祠城樓相對峙憑弔益凄其
七律九日集一粟軒用少陵韻云人間不及醉鄉寬貧
到淵明祇自歡身健不須蒼玉杖好奇甯假籜皮冠危
岷落木秋雲淡遠水孤帆夕照寒慚愧多年佳節負客

中隨分菊花看

五古俠客行殺人當殺強報仇須報徹飢腸飽黑心渴
酒灑頸血寶劍夜半鳴出門一片雪

摘句七言舟中遇雨云壓樹雲低帆影重去家日遠兩
聲愁答宗友云斷雲號月有孤雁積雨寒枝多病蟬咏
白桂云招隱每從垂老客探花多屬少年人確切不移
脫盡時流刻劃氣習寄家云愁中得句強于哭夢裡還
家亦當歸西延云雲結嵐光晴亦雨冷侵客夢夏如秋
五言秋即云夜寒知露重雲淡見山清柳州道中云白

雲山遠近紅葉路橫斜夜坐云有家歸亦客無事懶于
僧客館有懷云山翠晴猶滴雲容晚更奇陽朔道中云
江空魚入鏡山矗劍摩天留別云夢逐江雲遠身隨雁
影輕七里灘云歸鳥聲喧樹夕陽紅滿山峽東村先暝
嵐深樹早紅寒夜云篷疎燈易盡愁重酒無權道中云
村酒薄于水孤燈影作賓

七絕小樓云小樓近接西湖塘蓮葉田田柳葉長十五
女郎愁不識背人偷看戲鴛鴦分宜道中云袁江一綫
抱城斜白石長橋映晚霞瞬息榮華終古恨榜人猶說

相公家

七古清湘萬松歌云清湘砥道光如拭夾道青松高蔽
日三十年來夢裏遊今朝獨馬松間出半天風雨轟雷
霆百狀千形不可名謾謾濤聲撼地軸人在綠雲深處
行摩空一株真無偶蛟龍天矯雲中走數株肥短侏儒
形偃僂一樹龍鍾叟春蛇秋蚓青藤纏松枝憔悴藤孀
然從來正每教邪誤壯志慣牽兒女緣蜀道六龍不足
數何況秦家封五樹颯沓久覺白袷單夏變涼秋晴亦
雨安得十匹絹圖此萬蒼虬老我歸來好卧遊明月三

更涼似水蕭蕭一枕湘山秋

粵中民風刁悍健訟喜爭而邊隅僻壤動輒械鬪愍不
畏死往往以口角微嫌遂動干戈聚衆至于百金鼓旂
幟儼如對壘火礮轟擊互相夷傷雖經官判決仍尋仇
報復至有祖孫世相仇殺者有司莫之如何雖迭經剿
辦而其俗終難化焉予昔從戎至閩粵江三省交界之
區數十州縣皆叢山峻嶺其一種獷悍之氣令人生畏
男婦皆然出輒執尖担一枝約八九尺刀長二尺插于
腰間遇有急則以刀加于杖卽長矛矣一語不合互相

擊刺遇宿仇于道則要而刺之細詢居民咸曰此常事也官吏紳耆見慣不驚多不報案凡械鬪甲乙死傷相若則各掩埋而已或甲多傷一人則父老斷乙賠燒埋費數金勸解否則再鬪卽報案亦不過如斯而已或官捉兇急則買貧民年老將斃者塞口名曰買兇俗名宰白鴨甚有子逼賣其父者官亦樂其有以塞責也卽明知之而不問蓋不敢問也差役祇敢于城中傳喚不敢出城門一步焉地丁正課皆官爲之代納以顧考成此等缺分上下皆知其瘠苦數月一更代之于是官視署

如傳舍只圖敷此數月無事爲福後來者亦然新舊敷衍視以爲常吏民知其然也視官如過客積習相沿幾成化外時至今日雖有良牧令亦無如之何矣卽有心世道者欲移其俗方欲施行而瓜代又及且此等缺亦不能久居也委署數月尙賠累終身况久居乎故大府知之設數月之例以調劑之不知調劑之法行而其俗益不可問矣蓋大府知其缺苦尙未盡知其俗之熨若斯之甚也顧予嘗論之狂瀾非不可挽是在得人而治之耳然未可求驟效也欲化其俗必先擇其官以久于

其任欲使久任必先去其累或加其廉俸或多方津貼
務令其缺與中缺相若然後挑選廉能補之以六年爲
期俸滿超升期未滿而有卓異之政者保奏加銜過
班而不開缺使官知責無旁貸且有後圖正身率下不
敢敷衍吏民知非過客必有畏心沐其澤久自知觀感
則其化漸行其俗漸美矣不然未知所止也近因見施
玠臣太守文紹戒健訟戒械鬪詩因錄其詩而贅是說焉
其戒健訟詩云奉檄增江自去秋關心風俗遍諮諏祇
緣芥蒂嫌難釋散結瓜藤訟不休土棍主唆圖大嚼鄉

牌串捏復私仇可憐當局渾如醉頑石何曾肯點頭曉
曉結訟幾何年斷結仍翻案又懸供奉狀師如祖父承
迎書役等神仙爭雄虎背難停手作哽魚頭半在咽却
使富翁貪賤價衣裳典後鬻桑田曲直憑公已判明坐
輸妄想得翻羸絲棼未解甘心縛銖積辛勤挾忿傾兒
女何辜悲凍餒親朋受累輟耘耕當時縱把迷途指安
肯回頭履坦平亡羊始悔補牢遲枉費爭端百計持長
跪公庭輸鶴傲自投法網比蜂癡蚌由啄粟穿墉起禍
到傾家蕩產時易著終凶昭炯戒相期堅忍守文辭戒

械鬪云訟端久望息風波恨煞狂夫構衅多纔學蛙聲
能鼓譟陡從蝸角起干戈慘于兵燹因誰誤甘受瘡痍
奈若何底事相沿成積習幾時比戶化絃歌名教優游
樂最真紛紛糾殺果何因自屠骨肉成冤孽竟棄姻親
作敵人對壘有功推爛額解鈴無計嘆焦唇餘殃累及
池魚後宵小生心警四鄰邀得帮克若蟻攢僱時容易
散時難開門揖盜伊誰咎入室操戈反自殘本約同仇
如手足孰知失察痛心肝重闕複壁須防範終夜遷床
寢不安更靜猶聞客到門虛詞聳聽暗消魂力排和議

圖囊括妄擬機關使案翻堪笑主人持蚌鵝枉教新婦
具鷄豚座中醉飽空饒舌蠻觸何曾得解冤幾番彈壓
請兵差供帳多般莫滿懷周折情深齋壁饋搜羅財盡
典金釵執鞭下策求芻牧添竈陰謀索米柴况有虎威
狐假處風雲變幻總無涯西疇東陌本康衢胡乃驀陵
起匹夫鷄犬比隣恣焚掠烏鴻失所廢樵蘇原情尙覺
心懷惻按律應科首惡誅惟願頑民從此格同安耕鑿
媿唐虞施公粵西名進士湛深理學固不專以詩見長
者斯作曲盡訟鬪之弊亦煞費化導之苦心矣救世良

言原不必誇工鬪巧予作詩話本旨亦惟以闡揚忠孝
節義循良救時弊為主知君宦粵東數十年所至稱理
故亟錄之莫謂無循吏也其吉嗣星南明府廷弼登同
治戊辰進士現宰吾楚之黔陽善人有後信哉公以卓
異候升現寓省城予一見即知其爲正人君子恨龔甚
不能常聆其教言然數月必往一候之

漢江女校書蘋卿本宦家子流入青樓思屈身爲葬親
計求一可託者久之約歸某孝廉格于悍妻如期不往
僚侘而卒孝廉聞之大悔恨舁其柩并其二親骸骨歸

墓刻其所遺繡餘吟稿屬友人兩山許君鴻文爲製漢

皋逸事王笠舫進士有詩八章咏其事茲錄其一以存
其人焉一卷蠶眠春雪痕零脂墜粉洗銀盆美人早死
翻爲壽名士相招必有魂顧我何心佩蘭芷憐渠到底
殉椿萱青鴛冢小營齋奠未奠檀奴是寡恩

陸小姑者賓州人不得于所天被放歸越十二年而卒
性慧工吟咏鍵戶下帷與弟讀招社中總角小童嘔雅
其間供母甘旨焉滕司訓者拈紫蝴蝶花爲題課士小
姑寄呈一絕滕大稱賞因以名館汪孟棠觀察權思郡

爲刻其遺詩王笠舫進士咏其事茲錄其一云竹籬茅
舍送傾城豚栅牛欄看晚晴小別華年成永棄大歸心
事未分明月沉滄海秋無影潮打寒江夜有聲極目蒼
茫一延伫回看墻角短燈擎

卷四終

